

ABRAHAM SACRIFIANT

En pourroyent estre mal contens.
Il viendra quel que iour le temps
Que vous serez grand, si Dieu plaist :
[270] Et lors vous cognoistrez que c'est
De garder aux champs les troupeaux,
En danger par monts & par vaux,
De tant de bestes dangereuses,
Sortans des forests ombrageuses.

Isaac.

[275] Pensez-vous aussi que voulusse
Departir deuant que ie sceusse
Si mon pere ainsi le voudroit ?

Troupe.

Aussi faut-il en tout endroiet,
Qu'un fils domeste & bien appris,
[280] Quelque cas qu'il ait entrepris,
A pere & à mere obeisse.

Isaac.

Je n'y faudray point que ie puisse,
Et fust-ce iusques au mourir.
Mais tandis que ie vay courir
[285] Jusqu'à mon pere, pour cognoistre
Quelle sa volonté peut estre,
Voulez-vous pas m'attendre icy ?

Troupe.

Allez, nous le ferons ainsi.

Cantique de la Troupe.

O l'homme heureux au monde
[290] Qui dessus Dieu se fonde,
Et en fait son rampart :
Laissant tous ces hautains,
Et tant sages mondains
S'escarter à l'escart.

[295] Poureté ne richesse
N'empesche ny ne blesse
D'un fidele le cœur.
Quoy qu'il soit tormenté
Et mille fois tenté,